

Biar kita mengejar masa

“BAS dahlah sesak, pulak tu selalu datang lewat. Kami masuk kuliah pun lambat.”
“Sekarang sudah jam 4.40 petang, esok sajalah saya taip surat ini”

Biasa. Itu rungutan pelajar dan bicara pekerja di kampus kita (tanpa prejudis). Dasarnya sama. Tentang pengurusan masa.

Saya pernah ditanya oleh salah seorang panel penemu duga semasa memohon jawatan di kampus kita. Beliau maklum, saya graduan yang lahir dari Negara Matahari Terbit. Soalnya berbentuk provokasi.

Katanya, bangsa Melayu tidak boleh berjaya mengikut disiplin yang ada dalam diri bangsa Jepun. Kalaupun berjaya menjadi seorang yang menepati masa, selalunya selepas setahun dua kembali menginjak tanah air semula, segala-galanya hilang belaka. Bermukimlah “Jam Melayu” semula. Saya tertawa ketika soalan itu habis ditanya.

Saya menerima pengajaran mahal bagaimana mengurus masa semasa di sana. Paling mudah bagaimana mahu mengurus perjalanan untuk ke kuliah. Biasa bagi kami pelajar Malaysia berbasikal dari rumah sewa ke stesen kereta api. Kemudian, menaiki densha (keretapi elektrik) ke stesen universiti.

Selepas itu berjalan kaki mendaki bukit kecil bertangga batu ke Dewan Kuliah. Awal pengajian, saya selalu kalah untuk sampai tepat jam 8.30 pagi ketika kuliah bermula. Saya sengaja memilih universiti yang terletak di luar bandar.

Jadi, kereta api ke universiti tidak sekerap di bandar. Kalau terlepas kereta api waktu tertentu, maka saya terpaksa menunggu 45 minit untuk menaiki kereta api berikutnya. Itu belum ditambah lagi dengan pertukaran musim.

Musim dingin sangat sukar. Basikal terpaksa direhatkan. Kena keluar awal pagi berjalan kaki ke stesen kereta api, kerana perjalanan terganggu dek tebalnya liputan salji.

Pelajar kita sering merungut bas lewat dan penuh sesak. Saya selalu memerhatikan pelajar mula mengasak menaiki bas selepas jam 7.30 pagi. Bagaimana mahu sempat sampai ke kuliah jam 8 pagi?

Segelintir tenaga kerja kita pula menanggungkan kerja meskipun masa bertugas masih ada, sedangkan esok pasti kerja baharu menambah tugas sedia ada.

Saya menjawab panel penemuduga dengan jawapan pengalaman di atas. Itu hanya satu daripada ratusan pengalaman saya tentang masa. Bertitik tolak dari itu, baharulah saya mengerti mengapa masa menjadi begitu penting kepada masyarakat maju seperti mereka.

Ia benar-benar memberikan impak positif dalam mendisiplinkan saya hingga ke hari ini. Rutin tugas harian, seperti kita maklum, tidak akan habis sampai bila-bila. Tetapi, seboleh mungkin saya akan pastikan fail di tray masuk saya pada hari tersebut kosong semula, sebaik mesin kad perakam waktu berbunyi menandakan waktu bekerja tamat jam lima.

Kita hidup berkejar dengan masa. Masa tidak akan menunggu kita. Kitalah sebagai manusia yang diberi akal oleh Tuhan, memanipulasi masa untuk dipergunakan sebaiknya. Ironisnya masa bagi kebanyakan orang kita selalunya dipandang ringan dan enteng. Anda bagaimana? - *Abdul Atan Din*